

足本
蘇東坡全集

大東

行

蘇東坡內制集

卷一

賜正議大夫同知樞密院事安燾乞外郡不許批答（元祐元年十月八日）

覽表具之卿以應務之才居本兵之地綏靜中外人無間言何疑上章欲求去位未喻厥意聞之憮然夫榮親莫大於功名養志不專於甘旨而况觀闕之下父母之邦退食問安孰便於此勉循其舊以卒輔予

賜安燾乞外郡不允批答（元祐元年十月八日）

省表具之夫事親者不擇地而安之孝之至也而况艱難之際一日萬幾冰淵之懼當務同濟卿練達兵要灼知邊情寄託之深義難引去亟求自便朕何賴焉

賜正議大夫同知樞密院事安燾乞退不允批答口宣（元祐元年十月十日）

有敕卿被遇先帝勤勞有年逮于眇躬倚注彌重宜安厥位毋重力詞

雄州白溝驛賜大遼賀正旦人使御筵口宣（元祐元年十一月）

有敕卿等遠馳使節來慶春朝屬歲律之凝嚴涉道塗之脩阻宜頒宴衍以勞勤劬

趙州賜大遼賀興龍節人使茶藥口宣（元祐元年十月六日）

有敕卿等遠訪使輅來陳慶幣川塗甚阻風霧可虞特示至恩往頒名劑

賜正議大夫同知樞密院事安燾乞外郡不允斷來章批答口宣（元祐元年十一月十六日）

有敕卿職在樞要表儀百官進當以禮退當以義今茲求退其義安在亟還視事毋復固詞

雄州撫問大遼國賀興龍節使副口宣（元祐元年十月六日）

有敕卿等遠犯風埃久勤輶傳入疆茲始授館少安申命撫存式昭眷獎

賜金紫光祿大夫守尙書右僕射兼中書侍郎呂公著生日詔（元祐元年十

月二十七日）

敕公著卿將相三世輔翼兩朝方斯千獻夢之辰有既醉太平之福宜膺慶賚永錫壽康今賜卿生日羊酒米麵等具知別錄至可領也

賜皇叔祖建雄軍節度觀察留後同知大宗正事宗景上表辭恩命不允詔（

元祐元年十月九日）

敕宗景省上所上表辭免恩命事具悉朕初執珪幣祇見上帝嘉與百辟徵福文考大賚四海始于親賢皆神之休義不當避國有常典爾無固詞

賜皇叔祖宗景上表辭恩命不許詔（元祐元年十月九日）

敕宗景覽上所上表辭免恩命事具悉國家有大祭祀必均慶賞邦甸侯衛輝炮翟闡無有遠邇畢蒙惠澤矧我懿親實維顯相祇率舊典毋須固詞

賜鎮江軍節度使檢校太傅開府儀同三司上柱國康國公判大名府韓絳上

表乞致仕不許詔（元祐元年十月二十日）

敕韓絳覽上所上表陳乞致仕事具悉卿四世元老國之長城端笏垂紳不動聲氣風采所及自然折衝軒冕丘園其實何異矧今艱難之際自有冰淵之虞黃髮之廷未敢言病豈宜獨善遠欲卽安尙分北顧之憂勿起退歸之念強食自輔體我至懷

賜韓絳上表乞致仕不允詔（元祐元年十月二十日）

敕韓絳省所上表陳乞致仕事具悉功成身退入臣之常壽考康強有不得謝卿出入將相垂三十年豈以小物尙勤元老徒得君重臥護一方使吏民瞻師尹之儀刑蠻夷識漢相之風采丘園之請朕未欲聞其省思慮時寢食親近藥餌以副中外之望

趙州賜大遼賀興龍節大使茶藥詔

敕卿肅將慶幣遠涉川途風埃浩然徒馭勤止宜加寵錫以示眷懷

趙州賜大遼賀興龍節副使茶藥詔（元祐元年十月六日）

敕卿將命夙興犯寒遠涉駕言未息軫念殊深特致恩頒以嘉勤瘁

冬至福寧殿作水陸道場資薦神宗皇帝齋文

伏以聖神陟降釋梵後先適更來復之辰茂薦往生之福虔脩淨供仰導真游

趙州賜大遼賀正旦副使茶藥詔（元祐元年十月十九日）

敕卿抗旌出境夙駕在塗眷言跋涉之勞宜適與居之節式頒良劑以輔至和

趙州賜大使茶藥詔（元祐元年十月十九日）

敕卿遠飭使軺諱脩隣好蒙犯風霧跋履山川宜頒錫於珍芳庶輔安於寢食

趙州賜大遼國賀太皇太后正旦大使茶藥詔（元祐元年十月十九日）

敕卿恭諱隣歡遠勤軺馭言念驅馳之久適丁寒沍之辰宜錫珍良式昭眷寵

趙州賜副使茶藥詔（元祐元年十月十九日）

敕卿遠持使節來慶春朝方此沍寒良勤啓處宣示眷懷之異式頒劑和之良

趙州賜大遼國賀太皇太后正旦使副茶藥口宣（元祐元年十月二十八日）
有敕卿等奉將邦幣馳會歲元眷言風駕之勤方大中塗之館宜頒靈劑以喻至懷

趙州賜大遼國賀皇帝正旦使副茶藥口宣（元祐元年十月二十八日）
有敕卿等逖脩隣好方次州封言念沍寒想勤跋履特頒名劑以示眷懷

賜新除檢校太保依前河西軍節度使阿里骨加恩制告詔（元祐元年十月

十五日）

敕阿里骨朕涓選靈辰奉承宗祀肆均介福徧暨多方卿世撫侯封夙虔朝命特加寵渥用獎志嘉

賜新除依前交趾郡王李乾德加恩制告敕書（元祐元年十月十五日）
敕乾德朕躬執珪幣大饗帝親盼布湛恩徧暨諸夏卿世綏侯服欽順朝廷宜錫徽章以昭異數

太皇太后祭奠故夏國主祭文（元祐元年十一月十六日）

乃眷外臣嗣守西服襲累世之忠順荷先朝之寵光惟天難忱錫命不永訃音遽至閔悼良深特遣使車往
陳奠幣庶此恩禮貫于幽明

太皇太后賜故夏國主嗣子乾順詔（元祐元年十一月十六日）

念爾守邦藐然在疚日月逾邁祖葬有時緬懷孝愛之深想極攀號之戚往助襄事式昭異恩

太皇太后賜故夏國主嗣子乾順詔（元祐元年十一月十六日）

惟我列聖眷爾有邦非徒極其寵榮蓋亦同其憂患念爾哀疚惻然顧懷臨遣行人往喻至意且致奠賻之
禮以爲存沒之光

內中添蓋諸帝后神御殿告遷御容權奉安於慈氏殿祝文

於皇神考，肇啓閔祠，方增築之未寧，懼格思之有續，別嚴淨宇，祇奉辟容，式燕聖靈，永綏慈暇。

集禧觀開啓祈雪道場青詞

伏以麥將覆塊，雪未掩塵，嗣歲之憂，下民安訴，具嚴法會，祇款閔宮，仰冀同雲，溥滋新臘！

內中慈氏殿告遷神御於新添脩殿奉安祝文

伏以增築告成，閔嚴有奐，儼衣冠之來復，愾歎息之疑聞，昭格穆清，永綏燕翼。

故贈太師追封溫國公司馬光安葬祭文

嗚呼！元豐之末，天步惟艱，社稷之衛，中外所屬，惟是一老，屏予一人，名高當世，行滿天下，措國於太山之安，下令於流水之源，歲月未周，綱紀略定，天若相之，又復奪之，殄瘁不衰，古今所共知之者，神考用之者，聖母，馴致其道，太平可期，長爲宗臣，以表後世，往奠其葬，庶知予懷。

賜侍衛親軍馬軍都虞候劉昌祚進奉賀明堂禮畢馬敕書（元祐元年十一月二十日）

敕劉昌祚：大事告成，多方同慶，汝以分符之重，特脩效馬之儀，載念勤誠，不忘嘉數。

賜觀文殿大學士知穎昌府韓煥上表辭免恩命不允詔（元祐元年十一月二十五日）

敕韓煥：朕躬祀總章，始行嚴配，推廣帝親之澤，覃及中外之臣，惟我老成，逮受顧命，均此介福，非朕敢私，國之故常，毋煩謙避！

班荆館賜大遼賀興龍節人使到闕酒果口宣（元祐元年十二月初一日）
有敕：卿等肅將信幣，來慶誕辰，眷言行李之勞，宜有燕休之賜，受茲芳旨，體我眷懷！

就驛賜大遼賀興龍節人使迴程酒果口宣（元祐元年十一月二十四日）
有敕：卿等抗旌旋復，弭節少留，風埃浩然，徒馭勤止，宜有珍芳之賜，以昭眷寵之殊。

班荆館賜大遼賀正旦人使迴程酒果口宣（元祐元年十二月二十八日）
有敕：卿等遠會春朝，恪修隣好，既卒聘事，豈無燕私？宜就錫於加籩，蓋式昭於異數。

正旦於福寧殿作水陸道場，資薦神宗皇帝齋文。

伏以：棄黃屋以上賓，莫追風馭，抱烏號而永慕，再歷春朝，敢伏勝緣，式開淨供，仰頌義堯之德，永追堯舜之

游。

賜河東路諸軍來年春季銀鞋兼傳宣撫問臣寮將校口宣（元祐元年十二月七日）

有敕：（汝）卿等從來邊陲，服勤師律，方踐更於春令，諒率履於大和，特有匪頒，以昭眷遇。

雄州賜大遼賀正旦人使迴程御筵口宣（元祐元年十二月六日）

有敕：卿等出疆繼好，已事言還，跋履冰霜，憩休館舍，宜有燕私之寵，以旌來往之勤。

就驛賜大遼賀正旦人使銀鈔羅唾盂孟子錦被褥等口宣（元祐元年十二月十六日）

有敕：卿等遠持信幣，來慶春朝，眷言行李之勞，方茲舍館之定，宜加頒賚，用示寵嘉。

賜鎮江軍節度使判大名府韓絳詔書湯藥口宣（元祐元年十一月二十九日）

有敕：卿德望之隆，中外所屬，誠請雖極，輿論未安，毋復懷歸，以勤北顧，特頒良劑，以輔至和。

賜鎮江軍節度使判大名府韓絳上第二表乞致仕不許詔（元祐元年十一月二十九日）

敕韓絳爲國無強於得人，用人莫先於求舊，雖已挂冠而謝事，尙俾安車而造朝，豈有體力未衰，蕃宣所寄，亟圖自便，遂欲言歸，矧卿德望並隆，神人所相，焉有滿盈之懼？夫何倚伏之虞，尙體至懷，少安厥位！

賜韓絳上第二表乞致仕不允詔（元祐元年十一月四日）

敕韓絳朕以眇躬，求助諸老，皆以艱難之際，不詞中外之勞，胡爲累章，確守歸意，豈朕不善西伯之養，而無人子思之側乎？三復喟然，未喻厥指，朕意不易，卿其少安！

賜韓絳上第三表乞致仕不許斷來章詔（元祐元年十一月十四日）

敕韓絳君臣之義，憂樂同之，苟皆懷歸，誰任其事？卿之高識雅度，輕軒冕而樂丘園，天下所知也，獨不念先帝託付之重乎？勉徇大義，勿復以言！

賜韓絳上第三表乞致仕不允斷來章詔

敕韓絳功成身退，人臣之常禮，至於非常之遇，則必有無窮之報，朕待卿於形器之表，而卿自處於繩墨之內，未爲得也，朕意不易，卿無復辭！

賜正議大夫同知樞密院事安燾乞退不允詔（元祐元年七月十三日）

敕安燾卿才當其位，義不詞勞，內之樞機之謀，外之疆場之議，既當身任其責，難以家事爲詞，而况並奉君親，兩全忠孝，進無不得，退以何名？卿之所求，固非矯激，朕之不許，亦豈空文？亟還厥官，無煩朕命！

賜新除落致仕依前光祿大夫范鎮赴闕詔（元祐元年十月二十日）

敕范鎮夫有德君子，以精神折衝，譬之麟鳳，能服猛鸞，朕虛懷前席，以致諸老，非敢必以事譖也，苟得黃髮

蘇東坡內制集 卷一

八

之叟，幡然在位，則朝廷尊嚴，姦宄消伏，卿雖篤老，乃心王室，毋憚數舍之勞，以副中外之望！

賜外任臣寮曆日詔敕書（元祐元年十一月二十八日）

敕韓絳朕申命曰：官逆推嗣歲，眷予共理，頒此成書，勉劬農功，毋違時令！

賜新除依前中大夫守中書侍郎呂大防辭恩命不允詔（元祐元年十一月

四日）

敕大防卿敦大直方，任重道遠，擢貳西省，蔽自朕心。雖與聞政事，爲日未久，而歷試中外，勤勞百爲，蓋有年矣；德位惟允，人無間言，亟服新命，毋煩朕訓！

賜新除依前光祿大夫刑部尙書蘇頌辭恩命不允詔（元祐元年十月十七日）

敕蘇頌卿篤於仁心，深於經術，用心司寇，期於無刑。朕惟孝處之深，三年不奪其志；又惟才難之故，千里以待其來，卿而不能，誰當能者？亟服乃事，毋煩力詞！

賜新除御史中丞傅堯俞辭免恩命不允詔（元祐元年十一月六日）

敕堯俞詩云：「剛亦不吐，柔亦不茹。」朕以卿有樊仲之風，是以擢卿爲中執法，才難之歎，古今共之，豈以小嫌，而廢大任，與其拘文以自疑，不若直己而行義，亟服乃事，無煩固辭！

皇帝賜故夏國主嗣子乾順進奉賀正馬馳回詔（元祐元年十二月二十四日）

詔故夏國主嗣子乾順遠奉王正，來歸時事，惟此充庭之實，率皆任土之宜，乃眷忠勤，良深嘉歎！

太皇太后賜故夏國主嗣子乾順進奉賀正馬馳回詔（元祐元年十二月二

十四日

詔故夏國主嗣子乾順述職春朝歸誠宰旅修此效牽之視致其乘服之良再閱來章式嘉忠節

皇帝達太皇太后賀大遼正旦書（元祐元年十月）

肇易歲元發新榮於萬物仰遵慈誨修舊好於兩朝遠飭使輶肅將禮幣庶迎壽祉式副願言

皇帝賀大遼皇帝正旦書（元祐元年十月）

獻歲發春共講三朝之慶寶隣繼好茂膺五福之祥申飭使車往陳信幣永言欣頌曷罄論陳

奏告天地社稷宗廟宮觀寺院等處祈雨雪青詞齋祝文

伏以期年以來水旱作沴迨茲徂歲復苦常暘疾疫將興農末俱病方齋居而默禱庶精意之登聞敢祈春臘之交沛然雨雪之賜願均介福敷錫羣生

五嶽四瀆等處祈雪祝文

伏以歷冬不雪兩歲之憂疾癘將興麥薌就稿分命守土告於有神下民其咨天聽不遠毋愛同雲之澤以成盈尺之祥苟利於民敢忘其報

賜宰臣呂公著生日禮物口宣（元祐元年十月十六日）

有敕朕之元老生以茲辰實爲邦國之華豈獨闔門之慶故命爾息往宣余懷仍分廐庫之良以助子孫之

壽！

相州賜大遼國賀興龍節使副御筵口宣（元祐元年十月十八日）

有敕卿等遠馳信幣來慶誕辰眷言四牡之勞宜享加籩之禮式頒寵數以示至恩

送伴正旦使副公路與賀北朝生辰并正旦使副相見傳宣撫問口宣（元祐

元年十二月九日

有敕卿等方冬出使涉春在塗遠犯風埃恩勤跋履勉加鞭策卽造會朝

賜大遼賀正旦人使正月六日朝辭訖就驛御筵口宣（元祐元年十二月二十五日）

有敕卿等來脩舊好克備多儀既陞見以告辭將駕言而反命載嘉勤勤宜錫燕私

賜新除中大夫守尚書右丞劉摯辭恩命不許斷來章批答（元祐元年十一月）

覽表具之道有行藏時有用捨歲不我與難以智求道之將行豈容力避大言大利固當安而受之小行小廉非所望於卿者成命不再可無復辭

賜劉摯辭免恩命不允斷來章批答（元祐元年十一月）

省表具之政如農耕以旣穫爲能事言如藥石以愈疾爲成功若耕不穫疾不愈朕何望焉所以用卿者非以富貴卿也勉卒成業何以辭爲

相州賜大遼賀正旦人使却回御筵口宣（元祐元年十二月二十二日）

有敕卿等歲首奉觴禮成復命改轅北道拜節近藩宜錫宴私以彰眷寵

班荆館賜大遼賀正旦人使却回御筵口宣（元祐元年十二月十九日）

有敕卿等遠達使辭載嚴歸駟方改轅於北道暫拜節於都門益重眷懷往伸燕餞

賜大遼賀正旦人使正月一日入賀畢就驛御筵口宣（元祐元年十二月十

一日）

有敕卿等遠飭使輶來脩鄰好屬此方春之旦宜均既醉之歡爰命燕胥以昭眷寵

皇帝達太皇太后迴大遼皇帝賀正旦書（元祐二年正月五日）

百年之好既講於春朝萬壽之儀兼陳於燿殿恭因省侍具述來音感懌之懷言宣莫罄

皇帝迴大遼皇帝賀正旦書（元祐二年正月五日）

東風協應感徂歲之更新遠使交馳崇歡言而講舊粲然禮幣申以書詞欣懌之深敷陳罔究

賜鎮江軍節度使判大名府韓絳詔書賜藥口宣（元祐元年十一月十日）

有敕方面重寄無逾老成丘園歸休難遂雅意特頒珍劑以示至懷方此沍寒益加調養

賜新除依前中大夫守中書侍郎呂大防辭免恩命不允斷來章批答口宣（

元祐元年十一月十一日）

有敕大政所關西臺爲重朕難其選無以易卿宜卽欽承毋煩退避

賜新除中大夫守尙書右丞劉摯辭恩命不允斷來章批答口宣（元祐元年

十一月十五日）

有敕卿嘉猷屢告清議所歸授受之間臣主無愧速起視事副朕所期

班荆館賜大遼國賀興龍節人使赴闕口宣（元祐元年十一月二十一日）

有敕卿等抗旌遠道弭節近郊乃眷勤勞良深軫念特頒燕衍以示惠慈

卷二

皇帝爲冬節奏告永裕陵神宗皇帝表本

伏以歷紀天正，史書日至，謝舒長於測景，增忱惕於履霜，恭惟諡號皇帝，德邁堯仁，功恢禹迹，游衣冠於原廟，徒仰威神，望松柏於橋山，永懷悲慕。

皇太后殿夫人爲冬節往永裕陵酌獻神宗皇帝表本

伏以一陽來復，萬物懷生，空臨觀浸之辰，無復稱觴之慶，恭惟諡號皇帝，道齊覆載，德冒華夷，從南狩於蒼梧，神游已邈，望西陟於銅雀，涕慕空深。

皇帝爲十一月一日奏告永裕陵神宗皇帝日表本

伏以始饑於寒，復興嗣歲，寢園而增慕，悼日月之不留，恭惟諡號皇帝，道貫百王，澤涵萬宇，永瞻帝所之樂，坐起堯牆之悲，饋奠莫由，馳誠罔極。

皇太后殿夫人爲年節往永裕陵酌獻神宗皇帝表本

伏以葦桃在戶，徒講三朝之儀，椒柏稱觴，無復萬年之壽，恭惟諡號皇帝，功施無外，德洽有生，隨鼓漏於寢園，莫親饋奠，望衣冠於原廟，空極涕流。

皇帝爲三月一日奏告神宗皇帝日表本

伏以既成春服，時方禋洛之初，祗謁寢園，古有薦鮪之禮，恭惟諡號皇帝，配天立極，如日載陽，仰餘澤之旁流，致羣生之遂茂，光靈愈遠，涕慕空深。

皇帝爲神宗皇帝大祥往永裕陵奏告表本

伏以寢廟告成，永動廓然之感，柏城森列，遽興拱矣之悲，恭惟諡號皇帝，澤浸函生，慶垂後裔，配天無極，奉謨訓以長存，示民有終，悵神游之安在，恭脩祥奠，莫訴哀誠。

皇帝爲神宗皇帝大祥內中奏告表本

伏以追號岡極，實抱終身之憂；祥禪有期，蓋追先王之禮；恭惟諡號皇帝，睿明照世，神智自天，雖清廟肅雍，瞻之莫見，而威顏咫尺，凜然常存，悲慕之深，華夷所共。

皇太后殿夫人爲神宗皇帝大祥往永裕陵酌獻表本

伏以飢馭上賓，日以遠矣；隙駒過邁，祥而廓然；恭惟諡號皇帝，道始家邦，化刑夷夏；天地之運，固代謝於陰陽；草木何知，徒興悲於霜露；莫親饋奠，惟極哀誠！

賜觀文殿學士正議大夫知河南府孫固乞致仕不許詔（元祐二年正月一日）

敕孫固：視國如家，忠臣可以忘年；視民如子，君子可以忘勞。卿被遇三朝，出入二府，德望並隆，中外所服；故起之祠館，付以留籥，使士有所矜式，民有所依怙。屬任之意，豈輕也哉？釋位謀安，引年求避，此疎遠小臣之事，非所望於卿也。尚體至意，勿亟懷歸！

賜觀文殿學士正議大夫知河南府孫固乞致仕不允詔（元祐二年正月一日）

敕孫固：卿英宗所擢，以遺神考，乃眷舊學，用之西樞。朕卽位二年，未見君子，每惟圖任舊人之意，常有越在外服之歎。矧欲辭位而去，遂安丘園哉？三川重鎮，務舉大體，簿書期會，則有司存；優遊卒歲，可以忘老！

賜觀文殿學士正議大夫知河南府孫固再乞致仕不許詔（元祐二年正月一日）

二十五日

敕孫固：廊廟之舊，歷事三朝，名德並隆，如卿者有幾？無故釋位，其謂朝廷何？卿旣自爲謀，亦爲乃后謀之，勉遵前詔，以慰中外之望！

蘇東坡內制集 卷二

一四

賜觀文殿學士正議大夫知河南府孫固再乞致仕不允詔（元祐二年正月二十五日）

敕孫固朕永懷三宗，追用其人，所以尊禮慰藉其意者，自以爲無失矣。而卿浩然懷歸，若不可復留，何哉？勉徇大義，毋違朕志！

撫問熙河蘭會路臣寮口宣（元祐二年正月二十五日）

有敕卿等服勤疆場，賦政兵民，言念劬勞，實分憂顧，特加存問，以示眷懷。

在京諸官觀開啓神宗皇帝大祥道場齋文

伏以密音如昨，新穀再升，望仙馭於帝鄉，陳法筵於淨宇。人天來會，共脩最勝之緣；梵釋同游，永錫無疆之慶！

撫問資政殿學士知揚州王安禮口宣（元祐二年正月二十七日）

有敕卿久去廊廟，出臨江淮，綏懷流亡，肅遏寇盜，遠惟勤瘁，特示撫存。

賜尚書左丞李清臣生日詔（元祐二年二月二十四日）

敕清臣春之方中，月後幾望，薦生王國之彥，蔚爲廊廟之華。神既聽於靖恭，民亦宜於愷悌，膺我慶賜，永綏壽祺！

景靈宮奉安神宗皇帝御容祝文

伏以恭承仙馭，奄宅殊庭，聲海宇以駿奔，儼人天之景從。願同日月之照，少答神民之心！乃眷新官，永垂餘慶！

垂拱殿開啓神宗皇帝大祥道場齋文

伏以喪期有數，方敷於壑舟；法海無邊，聊資於岸棧；有嚴祕殿，恭啓淨筵；時御六龍，徘徊宮闕；永同千佛，陟降入天。

賜皇叔祖保信軍節度使安康郡王宗隱生日禮物口宣
有敕：卿屬尊望重，德厚慶隆，方誕育之令辰，有匪頒之故事，克膺壽祉，永服寵光！

天章閣權奉安神宗皇帝御容祝文

伏以唐虞稽古，雖絕名言；文武重光，已新崇構；下慰華夷之望，仰慕天日之容。將往宅於靈宮，永懷攀慕；願少安於祕殿，無盡瞻依！

賜皇叔祖寧國軍節度使華原郡王宗愈生日禮物口宣（元祐二年二月二

十七日）

有敕：卿望重宗盟，德隆藩服，載協誨彌之旦，光膺積慶之餘，特示寵頒，永綏壽祉！

內中福寧殿下寒節爲神宗皇帝作水陸道場齋文

伏以甚雨疾風，感春律之將變；鑽燧改火，悼喪期之不留。爰啓淨筵，以資冥福；願登大覺，永濟函生！

賜皇叔祖昭信軍節度使懷東郡王宗瑗生日禮物口宣（元祐二年二月二日）

有敕：卿爵齒旣隆，德望斯稱，載更誕日，胥慶家庭，式侑燕私，以資壽祉！

內中神御殿張挂奉安神宗皇帝御容祝文

伏以祥祭告終，聖靈改御，優如在位，威不違顏；雖天日之光，固難形似；而神人之奉，永有瞻依。悲慕愈深，照臨無極！

神宗皇帝大祥祭訖撤饌除靈座時皇帝躬親扶神御別設一祭祝文
伏以俛就終喪禮當卽遠永瞻陵廟將徹几筵攀慕若疑追懷罔極

寒節就驛賜于闐國進奉人御筵口宣（元祐二年二月）
有敕汝等觀光上國述職還方屬茲改火之辰想有懷歸之念宜頒燕衍以示恩私

賜新除樞密直學士知定州韓忠彥乞改一偏州不允詔（元祐二年二月）
救忠彥朕嘗覽閱古之圖觀宗臣之文俯仰今昔有概於心會中山關守差擇人門卿庶幾焉勉副朕意何
以辭爲

賜樞密直學士守兵部尚書王存乞知陳州不允詔

救王存卿出入四朝更涉夷嶮金石之節終始惟一六卿之長所以倡九牧而厚風俗也豈以職事煩簡爲
輕重哉君子出處朝廷之大事而風雨寒暑膚理之微疾也姑安厥位以稱朕意

奉安神宗皇帝御容赴景靈宮導引歌詞

帝城父老三歲望堯心天遠玉樓深龍顏髣髴笙簫遠腸斷屬車音離宮春色瑣瑤林雲闕海沉沉遺民猶
唱當時曲秋鴈起汾陰

景靈宮宣光殿奉安神宗皇帝御容畢皇太后親詣行禮祝文（元祐二年三
月十四日）

伏以奔奔祠宮巍巍天象聖靈雖遠哲命惟新仰瞻如在之威永錫無疆之慶敢祈昭鑒下燭微誠

景靈宮宣光殿奉安神宗皇帝御容日開啓道場青詞（元祐二年二月十四

日）